

PROPOSISHON PA LEI NOBO

*Informashon
pa
mayornan.*

AKOHIDA DI MUCHA HULANDA KARIBENSE



BES(t) 4 KIDS

Proposishon pa lei nobo Akohida di mucha Hulanda Karibense

E programa BES(t) 4 kids kier ofresé akohida di mucha bon, seif i pagabel pa tur mucha na Hulanda Karibense. Nos kier garantisá un ambiente seif i ku tin atenshon pa kuido pa mucha ku tur kas di famia por hasi uso di dje. Di manera ku kada mucha tin e oportunidat pa desaroyá su mes bon. Ta ankra e reglanan pa sentronan di mucha i pa 'gastouder' na Hulanda Karibense den un lei nobo. Promé ku e proposishon pa e lei nobo akí bira definitivo, ta diskutí ámpliamente tokante esaki. Den e foyeto aki por lesa e puntonan prinsipal di e proposishon di lei ku ta den preparashon.

Dikon un lei nobo?

Na e momentu akí ya tin un Ordenansa insular Akohida di mucha ku ta kontené hopi regla tokante kalidat di sentronan di mucha i 'gastouder'. Tin tambe kaba un areglo di supsidio temporal pa akohida di mucha. Ku e supsidio akí un akohida di mucha por drecha e kalidat i baha e gastunan pa mayornan. Den e proposishon pa e lei nobo ta ankra tur e reglanan pa kalidat pa un periodo largu. Banda di esei tin den e proposishon pará kon nos ta bai finansiá akohida di mucha den futuro, ora e areglo di supsidio temporal stòp. Ku tur esakinan huntu nos ta garantisá akohida di mucha bon, seif i pagabel.

Kiko ta kambia pa e muchanan?

Meskos ku den e Ordenansa Insular Akohida di Mucha, tin pará den e proposishon pa e lei nobo ku ta akohé muchanan den un ambiente seif i agradabel i ku hungando nan ta stimulá nan den nan desaroyo. Ta prepará e kolaboradónan den akohida di mucha pa esei. Esei ta tumando lugá kaba serka hopi organisashon di akohida di mucha.

Den e proposishon pa e lei nobo tin pará tambe ku muchanan ta haña tur dia un òf mas kuminda salú den e akohida di mucha. Akohida (despues di skol) lo mester organisá regularmente aktividatnan leuk tambe, manera deporte, pintamentu i komedia. Ademas nan mester tene kuenta ku edat i interes di mucha. Durante di fakansi eskolar muchanan por bai akohida despues di skol henter dia.

Akohida di mucha i skol básiko lo mester bai koperá mas estrecho. Esaki ta pa garantisá ku muchanan semper ta keda desaroyá nan mes bon i ku e transishon di akohida di mucha pa skol ta kana mas fleksibel.

Inspekshon di Enseñansa lo bai tene supervishon riba organisashonnan di akohida di mucha. Nan ta garantisá ku muchanan ta haña akohida bon i seif.



Kiko ta kambia pa mayornan?

E programa BES(t) 4 kids kier pa tur mayor por manda nan yunan akohida sin mester preokupá nan mes ku finansiamentu. Naturalmente e no ta un obligashon pa mayornan hasi uso di akohida di mucha. Pero pa desaroyo di muchanan ta bon pa manda nan akohida minimal un par di dia pa siman.

Pago di kontribushon di mayor

Den e proposishon pa e lei nobo tin pará ku mayornan, meskos ku awor ta e kaso, ta hasi palabrashonnan ku e organisashon di akohida di mucha tokante akohida di nan yu(nan). Ta pone e palabrashonnan ei den un kombenio por eskrito.

Loke ta kambia ta, ku mayornan ta bai paga e kontribushon di mayor na e unidat SZW di RCN, na lugá di na e sentro di mucha òf 'gastouder'. E montante di e kontribushon di mayor ta dependé di e entrada di e mayornan, na manera ku tur mayor por paga pa akohida di mucha. Tambe mayornan por skohe pa deskontá e kontribushon di mayor ku e kontribushon di mucha ku nan ta risibí serka SZW. Komo tur mayor ta bai paga via SZW ta keda desconosí pa e organisashon di akohida di mucha kiko entrada di e mayornan ta.

E unidat SZW di RCN ta paga e kompensashon pa e gastunan di akohida di mucha e ora ei den un bia na e organisashonnan di akohida di mucha. E montante di e kompensashon aki no ta dependé di kuantu e mayor por paga. Asina e organisashonnan di akohida di mucha tin e garantia di nan entrada i no tin e preokupashon si mayornan por paga nan kuenta (na tempu). Un sentro di mucha òf 'gastouder' no mag pidi mayornan kontribushon di mayor adishonal, tampoko un kontribushon boluntario. Organisashonnan di akohida di mucha no mag nenga mucha si no tin un lista di espera.

Altura kontribushon di mayor

Montante di e kontribushon di mayor den e propuesta di e lei nobo ta dependé di e entrada di e mayornan. Mester determiná e montante eksakto di kontribushon di mayor ainda. Pa mayornan ku (huntu) ta gana mas di \$25.000 bruto pa aña, ta pensa awor riba un kontribushon di mayor di mas òf ménos:

- **\$100 te \$150 pa luna pa 5 dia di akohida di mucha pa siman;**
- **\$50 te \$75 pa luna pa 5 dia di akohida despues di skol pa siman.**

E montantenan mensioná por kambia ainda. Esei ta konta tambe pa e límite di entrada di \$25.000.

Si un mucha ta bai akohida mitar di e tempu, e ora ei e mayor ta paga mitar di e kontribushon di mayor tambe.

Mayornan ku tin un entrada ménos ku \$25.000 pa aña, lo bai paga mas òf ménos \$40 pa luna pa pasadia i \$25 pa akohida despues di skol entrante 2022. Mayornan por entregá un petishon pa esei serka unidat SZW di RCN den e pais kaminda nan ta biba.

Tambe entidat públiko por disidí pa kompensá e kontribushon di mayor completamente si e famia ta biba den pobresa i tin hopi problema. Den e kaso ei por ta èkstra importante pa e mucha bai un akohida di mucha. Pa e mayornan ei e akohida di mucha ta grátis.

Embolbí mayornan aktivamente

Ku e lei nobo nos kier stimulá ku e organisashonnan di akohida di mucha ta embolbí mayornan den desaroyo di nan yu. Pa e motibu ei tin pará por ehèmpel den e proposishon ku organisashonnan di akohida di mucha mester instituí un komishon di mayor. Tambe mayornan por partisipá ora di organisá aktividatnan pa e muchanan. Tin bia e organisashon di akohida di mucha lo kier kompartí informashon tokante desaroyo di e muchanan ku otro organisashonnan, manera skol básiko. E ora ei mester pidi e mayor pèrmit.

